

### 成為天使，讓上帝嘅愛喺群體中流轉

弟兄姊妹大家好，好開心今日可以喺呢度見番好多熟識嘅面孔。今日係教會 67 週年堂慶嘅大日子，多謝教會透過國禧邀請我，俾我有機會可以同眾弟兄姊妹講幾句說話。我喺度謹祝以琳堂生日快樂，祈求上帝一如以往咁樣繼續使用我哋呢個群體，讓愛喺我哋中間流轉，俾我哋活出彼此相愛嘅生活見證，好叫人認出我哋係耶穌基督嘅門徒。《約翰一書 4:19》這樣說：「我們愛，因為神先愛我們。」人生總會有順境同逆境嘅時候。喺順境嘅時候，我哋一切都安好同安穩妥當；但係當逆境臨到嘅時候，如果我哋身邊嘅人能夠向我哋伸出援手嘅話，呢個人就會成為我哋喺困境中嘅天使。

今年，我遭遇到人生嘅重大逆境：於年初時我患上突發性急性中風，經過入院治療之後，而家已經出咗院，正處於復康階段。喺我患病同復康嘅期間，上帝差派咗唔少天使喺我身邊嚟照顧我同關懷我；這當中包括咗少燕師母日以繼夜、夜以繼日咁喺我身邊照顧我嘅日常起居生活；女兒家靖更肩擔起整個家嘅日常運作：包括我住院以及出院嘅安排，跟進家居穗禾苑嘅屋苑強制大維修事宜；至於契女嘉雯就喺我哋決定租用馬鞍山海澄軒酒店嘅服務式住宅作為我出院後暫住嘅居所後，協助家靖將我哋一家嘅日常用品由穗禾苑運送到馬鞍山嘅海澄軒，使我哋一家三口喺我出院之後能夠輕鬆順利，一無所缺咁入住海澄軒酒店嘅服務式住宅。

喺我住院期間以及搬到馬鞍山嘅酒店暫住之後，唔少弟兄姊妹：好似艷明、舜霞、國禧、秀娟、翠玉都有前來探望我同師母，為我哋送上問候、關心同鼓勵。至於少娟、淑芳更喺我住院期間不時帶來愛心湯水俾我享用。喺我出院之後，前來馬鞍山探望我同少燕師母嘅弟兄姊妹亦都為數不少，小玲、少娟同埋淑芳更帶同大包小包嘅日常生活用品同食品前來馬鞍山嘅酒店供給我哋，以減輕少燕師母嘅辛勞；啟璋、國華、嘉鳳同埋立向，更將復健用嘅器材送入嚟俾我使用，小玲又上網為我搜羅唔同

嘅復健用品，唔單只幫我購買，更擺埋入嚟俾我用。而 Anna 同阿 Frank 更喺我出院之後多次喺崇拜後專程入到馬鞍山嘅酒店為我剪頭髮。喺呢啲弟兄姊妹嘅身上，我經驗到嘅就係上帝愛嘅彰顯。可以咁講，佢哋每一個都係從上帝而嚟嘅「無翼天使(angels without wings)」！我要感謝讚美上帝，因為上帝讓我成長於以琳堂呢個充滿住上帝愛嘅群體，成為其中嘅一員。喺我健康同埋有能力嘅時候，我就學習去付出愛同埋施予關懷；而喺我軟弱同衰敗嘅時候，我就要謙卑咁接受弟兄姊妹對我嘅照顧同埋施予，好讓愛「喺我哋中間流轉」，實踐主耶穌俾我哋「彼此相愛」嘅吩咐。

親愛嘅弟兄姊妹，喺教會 67 週年堂慶嘅日子，我願意與你哋彼此互勉，我哋各人都不單只要歡喜快樂咁領受上帝嘅恩典，遇到天使，更加要鞭策自己努力去成為有需要嘅弟兄姊妹嘅天使，好叫我哋能夠彼此祝福，讓上帝嘅愛喺我哋呢個群體中間隨意流轉，使我哋成為一個活出上帝愛嘅群體，讓上帝喺其中得著當得嘅榮耀。

讓我哋低頭同心祈禱。

親愛嘅阿爸父上帝，多謝祢俾我哋一直喺祢嘅恩典底下成長，懇求祢幫助我哋不單只領受恩典，更加要敏銳於聖靈嘅感動同帶領，好成為祢恩典嘅出口，讓祢嘅愛喺以琳呢個群體中間隨意轉流，成為一個充滿住祢愛嘅群體，令每一個嚟到以琳堂嘅人都感受到祢嘅愛，經歷得到祢嘅豐盛同真實，禱告係奉主名求，阿門。